



Adresa: **Ul. Hamdije Čemerlića 39a**
71000 Sarajevo
<http://www.voda.ba>

tel. +387 33 726 400
fax. +387 33 726 423
e-mail: info@voda.ba

Broj: **UP-1/21-3-40-564-4/23**
Datum: **07.03.2024.godine**

„Agencija za vodno područje rijeke Save“ Sarajevo rješavajući po zahtjevu pravnog lica, „TVORNICA ALATA GORAŽDE“ d.d. Goražde za donošenje rješenja o vodnoj dozvoli za ispuštanje tehnoloških otpadnih voda iz pogona za proizvodnju mašinskih pozicija (pogon alatnice-objekat 103), izgrađenih u krugu industrijske zone „Pobjeda“, općina Goražde, u ulici Višegradska bb, na osnovu člana 109. stav (1) tačka 2. Zakona o vodama („Službene novine Federacije BiH“, broj 70/06), i člana 200. stav (1) Zakona o upravnom postupku („Službene novine Federacije BiH“, broj 2/98, 48/99 i 61/22), donosi:

RJEŠENJE **o vodnoj dozvoli**

1. Pravnom licu, „TVORNICA ALATA GORAŽDE“ d.d. Goražde, daje se vodna dozvola za ispuštanje tehnoloških otpadnih voda iz pogona za proizvodnju mašinskih pozicija (pogon alatnice-objekat 103), izgrađenih u krugu industrijske zone „Pobjeda“, općina Goražde, u ulici Višegradska bb.
2. Ova vodna dozvola ne oslobađa podnosioca zahtjeva obaveze pribavljanja saglasnosti i dozvola, od strane drugih nadležnih organa, a sve u skladu sa važećim zakonskim propisima, odlukama i dr.
3. Vodna dozvola se daje na osnovu činjeničnog stanja utvrđenog pregledom dostavljene dokumentacije i izvršenim uviđajem na objektu, pod slijedećim uslovima:
 - 3.1. Da pravno lice, „TVORNICA ALATA GORAŽDE“ d.d. Goražde, obezbijedi da se sistem za prikupljanje, prečišćavanje i ispuštanje otpadnih voda nastalih u procesu iz pogona za proizvodnju mašinskih pozicija (pogon alatnice-objekat 103) te pranjem opreme i radnih površina kao i iz objekata izgrađenih u krugu predmetnog proizvodnog kompleksa, održavaju u funkcionalnom stanju i koriste u skladu sa namjenom i uslovima iz ove vodne dozvole.
 - 3.2. Da se vrši redovno čišćenje separatora i pratećih elemenata, te odvoz i konačno zbrinjavanje otpadnog mulja i taloga, kao i opasnog otpada sa lokacije predmetnog proizvodnog kompleksa može vršiti isključivo firma ovlaštena za tu vrstu djelatnosti, prema sklopljenom ugovoru. O načinu i vremenu radova održavanja, odnosno o pražnjenju, odvozu i zbrinjavanju sadržaja separatora, neophodno je voditi službenu evidenciju.
 - 3.3. U toku važenja ovog Rješenja, korisnik predmetnih objekata je obavezan poduzeti sve potrebne mjere kako bi kvalitet tehnoloških otpadnih voda, a prije ispuštanja u recipijent, zadovoljio granične vrijednosti u skladu sa Prilogom 1. tabela 1.1. kolona 3. Uredbe o uslovima ispuštanja otpadnih voda u okoliš i sisteme javne kanalizacije („Službene novine Federacije BiH“, broj: 26/20, 96/20 i 1/24).
 - 3.4. Korisnik objekta je dužan, putem laboratorije ovlaštene od strane Federalnog ministarstva poljoprivrede, vodoprivrede i šumarstva, vršiti redovna ispitivanja kvaliteta otpadnih voda, uzimanjem uzorka efluenta iz okna za monitoring, a prije ispuštanja u recipijent u skladu sa članom 19. stav (4) Uredbe o uslovima ispuštanja otpadnih voda u okoliš i sisteme javne kanalizacije. Učestalost i način ispitivanja vršiti u skladu sa članom 20. Uredbe o

- uslovima ispuštanja otpadnih voda u okoliš i sisteme javne kanalizacije. Rezultate analiza dostaviti ovoj Agenciji.
- 3.5. Ukoliko Vlada kantona propiše dodatne (strožije) uvjete, od uvjeta definisanih u Prilogu 1. tabeli 1.1. kolona 3. Uredbe o uslovima ispuštanja otpadnih voda u okoliš i sisteme javne kanalizacije, podnosilac zahtjeva je u obavezi iste ispoštovati.
 - 3.6. Da korisnik obavezno praktikuje suho čišćenje prije pranja vodom, da bi se uklonile nečistoće sa radnih površina, trošilo manje vode za pranje i time smanjilo zagađenje u otpadnim vodama.
 - 3.7. Da se kod pranja koriste sredstva koja su prikladna okolinskim zahtjevima.
 - 3.8. Da se u skladu sa propisima iz oblasti zaštite okoliša, vrši bezbjedno skladištenje i postupanje sa opasnim materijama i otpadom nastalim na predmetnom lokalitetu (adekvatnim mjerama onemogućiti bilo kakvo isticanje i rasipanje opasnih i štetnih materija na tlo i u vode).
 - 3.9. Sadržaj (mulj) iz uređaja za prečišćavanje otpadnih voda i ostali otpad ne smije se odlagati na česticu «vodno dobro», odnosno u vodotoke i na njegove obale.
 - 3.10. Na predmetnoj lokaciji nije dozvoljeno indirektno ispuštanje otpadnih voda u podzemne vode.
 - 3.11. Da se nastali otpad na predmetnoj lokaciji prikuplja i privremeno odlaže u skladu sa važećim propisima o postupanju sa otpadom, a za zbrinjavanje istog potpiše ugovor sa ovlaštenom firmom za tu vrstu djelatnosti.
 - 3.12. Osigurati priručna sredstva za brzu intervenciju u slučaju nekontrolisanog istjecanja opasnih supstanci, kako bi se spriječilo moguće onečišćenje voda i tla (piljevina, prikladni apsorbenzi, odgovarajuće posude, uređaji za pretakanje i sl.).
 - 3.13. Investitor je obavezan pridržavati se svih mjera i uslova propisanih u saglasnostima i dozvolama, izdatim od strane drugih nadležnih organa, a odnose se na korištenje i zaštitu voda i nisu u suprotnosti sa uslovima iz ove vodne dozvole.
4. Vlasnik, odnosno korisnik objekta je obavezan voditi propisne evidencije, te nadležnim organima dostavljati propisane obrasce (Obrazac EBS) u skladu sa Zakonom o vodama („Službene novine Federacije BiH“, broj 70/06) i Pravilnikom o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte vodne naknade i posebnih vodnih naknada („Službene novine Federacije BiH“, broj 92/07, 46/09, 79/11, 88/12 i 03/16), Prilog 1. Poglavlje V – Određivanje koeficijenata zagađenja za zagađivače voda kod kojih se ne vrše direktna mjerenja voda, te prema dostavljenim obrascima izvršavati u cjelosti i u propisanim rokovima obavezu plaćanja vodnih naknada.
 5. U periodu važenja ove dozvole, korisnik predmetnog objekta „TVORNICA ALATA GORAŽDE“ d.d. Goražde, je dužan provoditi sve mjere i aktivnosti propisane istom.
 6. Ukoliko radom predmetnog objekta dođe do šteta ma kakvog karaktera, korisnik vodne dozvole je dužan uzroke nastalih šteta otkloniti, a nastale štete trećim licima nadoknaditi.
 7. U slučaju izvanrednih situacija, havarijskih onečišćenja i drugih sličnih okolnosti, čime bi bio ugrožen kvalitet podzemnih i površinskih voda, korisnik objekta obavezan je izvijestiti nadležne organe i izvršiti izvanredna postupanja po nalogu nadležnih organa, te o vlastitom trošku uzroke štete otkloniti, a nastale štete nadoknaditi.
 8. Ukoliko usljed štetnog djelovanja voda nastalog zbog neizgrađenosti ili nedovoljne osposobljenosti (zaštitnih) vodnih objekata dođe do nastanka štete na objektima predmetnog kompleksa sa pratećim sadržajima obuhvaćenim ovom vodnom dozvolom, korisnik zaštitnih vodnih objekata nije odgovoran za nastale štete.
 9. Prava stečena po ovoj dozvoli ne mogu se prenositi na treća lica, a ista prestaju u skladu sa odredbama Zakona o vodama.
 10. Ova vodna dozvola, shodno članu 117. stav (1) Zakona o vodama se daje sa rokom važenja od 5 (pet) godina od dana pravosnažnosti ovog rješenja.

11. Prije isteka važnosti ove dozvole, Investitor je dužan da podnese zahtjev za izdavanje nove vodne dozvole.
12. Ova vodna dozvola može se izmijeniti ukoliko za to nastupe razlozi utvrđeni u članu 130. stav (1) tačka 1., 2., 3. ili 4. Zakona o vodama, a zainteresirane stranke podnesu argumentiran zahtjev.

Obrazloženje

Pravno lice, „TVORNICA ALATA GORAŽDE“ d.d. Goražde zahtjevom broj: 1990/23 od 08.12.2023. godine, obratilo se ovoj Agenciji za donošenje rješenja o vodnoj dozvoli za ispuštanje tehnoloških otpadnih voda iz pogona za proizvodnju mašinskih pozicija (pogon alatnice-objekat 103), izgrađenih u krugu industrijske zone „Pobjeda“, općina Goražde, u ulici Višegradska bb.

U provedenom postupku dostavljena je i pregledana sljedeća dokumentacija:

A. Opšta dokumentacija

- Rješenje o izmjenama podataka u sudskom registru, broj: 045-0-Reg-23-000 075 od 23.10.2023. godine, Kantonalni sud Goražde- ovjerena kopija,
- Ovjerena kopija Uvjerenja o poreskoj registraciji izdatoj od Porezne uprave Kantonalni ured Bosansko-podrinjski, Goražde od 10.10.2002. godine,
- Uplatnica za upravnu taksu u iznosu od 70,00 KM na zahtjev,
- Rješenje o vodnoj dozvoli broj UP-I/25-3-40-273-6/19 od 01.10.2019. godine, izdato od strane „Agencije za vodno područje rijeke Save“ Sarajevo,
- Izvještaj o ispitivanju kvalitativnih i kvantitativnih karakteristika efluenta „TVORNICA ALATA GORAŽDE“ d.d. Goražde, broj: 1573/23, novembar 2023. godine, urađen od strane «Inspekt-RGH» d.o.o. Sarajevo,
- Ugovor o sakupljanju, skladištenju i zbrinjavanju opasnog otpada broj: 86-1-v/23 od 15.05.2023 godine sklopljen sa ovlaštenom firmom „Goraždanska trgovina“ d.o.o Goražde,
- Obavijest o okolinskoj dozvoli broj: 09-23-410-1/19 od 24.09.2019. godine izdato od Ministarstva za prostorno uređenje i zaštitu okoliša Bosansko-podrinjskog kantona, Goražde,
- Zapisnik o inspekcijskom nadzoru broj: UP-1-12-21-0005/2023 od 10.10.2023. godine sačinjen od strane Kantonalne inspekcije-Vodni inspektor,
- Račun –otpremnicu br. 16/21 za separator ulja i masti BP OLEX 1M/KF/O/SNECO od 26.03.2021 godine.

Nakon izvršenog uvida u dostavljeni zahtjev i priloženu dokumentaciju utvrđeno je da su uz zahtjev dostavljeni potrebni prilozi, te je ovaj organ u skladu sa odredbama Zakona o upravnom postupku pokrenuo postupak u ovoj upravnoj stvari i u skladu sa članom 12. stav (5) i (6) Pravilnika o sadržaju, obliku, uvjetima, načinu izdavanja i čuvanja vodnih akata („Službene novine Federacije BiH, broj 31/15, 55/19, 41/20 i 63/22), izvršen je obilazak predmetne lokacije i tom prilikom sačinjen zapisnik o uviđaju broj: UP-1/21-3-40-564-2/23 od 06.03.2024. godine.

Uvidom u dostavljenu dokumentaciju i izvršenim uviđajem na licu mjesta može se konstatovati sljedeće:

Pogon za proizvodnju mašinskih pozicija (pogon alatnice-objekat 103), smješten je u krugu industrijske zone „Pobjeda“, općina Goražde, u ulici Višegradska bb.

Proizvodni kapacitet tvornice (alatnica, štanceraj i kalionica) je oko 5,5 t mjesečno.

Proces proizvodnje i mašinske obrade elemenata se vrši na mašinama namijenjenim za tu vrstu djelatnosti. U samom procesu se koriste emulzije za hlađenje koje se nakon zasićenja –istrošenosti mijenjaju i zbrinjavaju od strane ovlaštene firme.

Pogoni alatnice i štanceraja su sa vodonepropusnim podom bez ispusta i čišćenje istih se vrši suhim putem.

Pravno lice „TVORNICA ALATA“ d.d. Goražde je posjedovalo Rješenje o vodnoj dozvoli broj: UP-I/25-3-40-273-6/19 od 01.10.2019. godine izdato od strane Agencije za vodno područje rijeke Save Sarajevo.

Prilikom uviđaja utvrđeno je da u tehničko-tehnološkom smislu, obimu i uslovima snabdijevanja i načinu prikupljanja i ispuštanja otpadnih voda u predmetnom poslovnom objektu, pravnog lica nije došlo do promjena od izdavanja navedenog Rješenja o vodnoj dozvoli.

Prilikom uviđaja na terenu utvrđeno je da podnosilac zahtjeva je završio aktivnosti navedene u dinamičkom planu a činile su sastavni dio dispozitiva Rješenja o vodnoj dozvoli a koji su uticali na smanjenje zagađenja voda, završio je nabavka i ugradnja separatora za ulja i naftne derivate za tretman otpadnih voda iz pogona za kaljenje mašinskih elemenata.

Tehnološke otpadne vode od predmetne aktivnosti nastaju u pogonu za proizvodnju mašinskih pozicija (pogon alatnice-objekat 103), u procesu ispiranja metalnih elemenata, nakon hlađenja, u postupku kaljenja. Ove vode se iz korita za ispiranje kaljenjih elementa ispuštaju u separator ulja i naftnih derivata a potom preko okna za monitoring u Podhranjski potok odnosno rijeku Drinu.

U pogonu alatnice-objekat 103 se vrši izrada gotovih proizvoda od metala, mehaničkom obradom i bez upotrebe vode, te u ovom procesu proizvodnju ne nastaju tehnološke otpadne vode.

Snabdijevanje tehnološkom vodom tvornica u krugu industrijske zone Pobjeda vrši se iz sistema vodosnabdijevanja kojim upravlja pravno lice Unis „Ginex“ d.d. Goražde.

Oborinske vode sa zajedničkih manipulativnih površina i internih saobraćajnica se prikupljaju otvorenim betoniranim rigolima i kanalima i bez ikakvog predtretmana ispuštaju u Podhranjski potok.

Ulje za hlađenje je smješteno u bazenu za ulje koje se povremeno dopunjava.

Na osnovu dostavljene dokumentacije i uviđaja izvršenog na predmetnoj lokaciji, a u svrhu smanjenja negativnih uticaja predmetnog objekta na stanje voda i vodni režim, podnosiocu zahtjeva su ovom vodnom dozvolom u tački 3. dispozitiva Rješenja propisani uslovi u skladu sa odredbama članova 53. i 116. Zakona o vodama, člana 12. i 13. Pravilnika o sadržaju, obliku, uvjetima načinu izdavanja i čuvanja vodnih akata i odredbama člana 3. tačka s) i članova 14., 19. i 20. Uredbe o uslovima ispuštanja otpadnih voda u okoliš i sisteme javne kanalizacije.

Tačka 4. dispozitiva rješenja je propisana u skladu sa tačkama 12. i 35. Pravilnika o načinu obračunavanja, postupku i rokovima za obračunavanje i plaćanje i kontrolu izmirivanja obaveza na osnovu opšte i posebnih vodnih naknada („Službene novine Federacije BiH“, broj 92/07, 46/09, 79/11 i 88/12) i Odlukom o visini posebnih vodnih naknada („Službene novine Federacije BiH“, broj 46/07, 10/14 i 03/16).

Na osnovu provedenog postupka konstatuje se da je podnosilac zahtjeva, „TVORNICA ALATA“ d.d. Goražde, ispunio minimum uslova za izdavanje vodne dozvole za ispuštanje tehnoloških otpadnih voda sa predmetne lokacije BS u Gradačcu te je riješeno kao u dispozitivu ovog rješenja.

Podnosilac zahtjeva je, na ime izdavanja ovog vodnog akta, izvršio uplatu federalne pristojbe iz tar. br. 43. Zakona o federalnim upravnim pristojbama i Tarife federalnih upravnih pristojbi („Službene novine Federacije BiH“, br. 6/98, 8/00, 45/10 i 43/13).

Uputa o pravnom lijeku:

Protiv ovog rješenja može se uložiti žalba Federalnom ministarstvu poljoprivrede, vodoprivrede i šumarstva, u roku od 15 dana od dana prijema rješenja.

Žalba se podnosi neposredno pismeno ili preporučeno putem pošte ovom organu i taksira se sa 15 KM takse, prema tarifnom broju 3. Tarife federalnih administrativnih taksi.

Obradivač akta:

Ahmedić Behija dipl.inž.tehn.

Po ovlaštenju
Rukovodilac sektora za izdavanje vodnih akata



Haris Ališehović, dipl. inž. građ.

Dostaviti:

- „TVORNICA ALATA“ d.d. Goražde, Višegradaska bbl
- AVP Sava, ISV – Vodna knjiga
- Sektor 50
- Sektor 40, arhiva
- Oblasna tabla AVP-Sava Goražde